

Cwestiynau Cyffredin ar

Asesu Risgiau ac Anghenion Clinigol y Geg (ACORN)

1. Beth yw ACORN?

Pecyn cymorth a ddyluniwyd gan weithwyr proffesiynol deintyddol yn ystod y Rhaglen Diwygio Gwasanaethau Deintyddol Cyffredinol yw ACORN sy'n cefnogi timau deintyddol i gynnal asesiad cynhwysfawr o risgiau ac anghenion mewn modd systematig. Mae'n crynhoi canfyddiadau o hanes ac archwiliadau clinigol y claf. Mae'n cefnogi practisau i roi cyngor sydd wedi ei deilwra i'r claf a chytuno ar gynllun gofal deintyddol blynyddol ataliol.

2. Pa mor aml y dylid cwblhau asesiad ACORN?

Dylid cynnal asesiad ACORN yn drylwyr unwaith y flwyddyn h.y. bob 12 mis.

3. A oes angen i mi gynnal asesiad ACORN pan fydd claf yn cael gofal deintyddol brys?

Nac oes.

4. A yw ACORN yn ymwneud â thicio blychau ar y ffurflen FP17W er mwyn cyflwyno data?

Nac ydy. Nid ymarfer ticio blychau yw ACORN. Er y gellir casglu'r 8 pwynt data ACORN ar FP17Ws a gyflwynwch ar gyfer cleifion i ddeall proffil 'risg ac anghenion' poblogaeth eich practis.

Amcanion allweddol defnyddio pecyn cymorth ACORN yw:

- Deall beth sy'n bwysig i gleifion
- Cyfleu lefel y risg a'r angen i gleifion (neu eu gofalmwyr) yn effeithiol a gweithio gyda chleifion i wneud iddynt ddeall newidiadau y mae angen iddynt eu gwneud er mwyn atal clefydau deintyddol
- Cytuno ar y canlyniadau iechyd y geg y mae cleifion am eu cyflawni dros gyfnod o amser neu ar ôl cwrs o ofal deintyddol.
- Defnyddio egwyddorion gwneud penderfyniadau ar y cyd wrth lunio cynllun gofal deintyddol ataliol
- Monitro newidiadau yn 'risgiau ac anghenion' cleifion sy'n derbyn gofal parhaus gan y gwasanaeth/practis.

5. A yw cronfa ddata ACORN yn cael ei monitro?

Ydy, ar sail 8 pwynt data ACORN ar y ffurflen FP17W a gyflwynir gan eich practis, bydd Awdurdod Gwasanaeth Busnes (BSA) y GIG yn dadansoddi'r data ac yn darparu proffil 'risgiau ac angen' o'ch practis ar Eden. Dadansoddir data hefyd i fonitro pa ganran o'ch cleifion arferol sy'n cael asesiad ACORN.

Cysylltwch ag Awdurdod Gwasanaeth Busnes y GIG os oes gennych unrhyw gwestiynau ynghylch cofnodi data ar ffurflenni FP17W a'r data a ddangosir ar e-Den - nhsbsa.dentalinsight@nhs.net.

6. Sawl math o becyn cymorth ACORN sydd ar gael?

Dim ond un math o becyn cymorth ACORN sydd, sef dull safonol o asesu risgiau ac anghenion iechyd y geg ym mhRACTISAU deintyddol y GIG yng Nghymru.

Gellir dod o hyd i ganllawiau ACORN yma: [Diwygio Deintyddol - Gofal Sylfaenol Un \(gig.cymru\)](#).

7. A ellir cwblhau asesiad ACORN o bell?

Gellir cwblhau llawer ohono o bell. Yn sicr, gellir cwblhau elfen asesiadau risg ACORN o bell dros y ffôn neu drwy fideo.

8. A ddylwn i gynnig apwyntiad i gleifion sy'n cael gofal deintyddol brys er mwyn dod yn ôl i'r practis i gael asesiad llawn?

Dylech. Disgwylir y bydd claf nad yw'n derbyn gofal deintyddol rheolaidd gan bractis yn cael cynnig cyfle i ddod yn ôl am asesiad ACORN a chynllunio gofal deintyddol ataliol sydd wedi ei deilwra i'r claf yn flynyddol. Os bydd claf yn gwrthod y cynnig, dylai practis nodi hyn ar gofnod y claf.

9. A oes hyfforddiant ar gael ar sut i gynnal asesiad ACORN?

Oes, mae hyfforddiant ar-lein ar gael gan AaGIC (<https://ytydysgu.heiw.wales/go/qwlmhn>). Mae canllawiau ACORN ar gael ar wefan Gofal Sylfaenol Un.

10. Os yw claf yn dangos yn glir bod ei ymddygiad wedi newid o fewn y 12 mis ar ôl asesiad ACORN, a ellir ailadrodd asesiad ACORN yn gynt na 12 mis?

Dylid cynnal asesiad ACORN yn drylwyr unwaith y flwyddyn. Ar ôl ei gynnal cynnal yr asesiad a llunio cynllun gofal deintyddol blynyddol, mae'n bosibl y bydd angen i gleifion ddod yn ôl ar gyfer apwyntiadau adolygu. Gellir cofnodi unrhyw welliant mewn risgiau ac angen a welir yn yr ymweliadau adolygu hynny ar nodiadau cleifion ond nid oes angen cwblhau asesiad ACORN llawn. Defnyddir y pecyn cymorth ACORN er mwyn ailadrodd asesiad cynhwysfawr o risgiau ac anghenion ymhen 12 mis o'r ACORN blaenorol.

11. Fel practis deintyddol y GIG, a allaf wrthod cynnal asesiad ACORN ond cymryd rhan yn y Rhaglen Diwygio Gwasanaethau Deintyddol Cyffredinol?

Na allwch. Mae ACORN yn rhan hanfodol o'r Rhaglen Diwygio Gwasanaethau Deintyddol Cyffredinol. Ar gyfer practisau nad ydynt am fod yn rhan o'r Rhaglen Diwygio Gwasanaethau Deintyddol Cyffredinol, y sefyllfa gytundebol ddiofyn yw cyflawni targed Unedau Gweithgarwch Deintyddol o dan y Rheoliadau Gwasanaethau Deintyddol Cyffredinol/Gwasanaethau Deintyddol Personol presennol. Disgwylir y bydd y rhan fwyaf, os nad pob un, o bractisau'r GIG yn manteisio ar y cynnig o weithio o dan amodau nad ydynt yn amodau Unedau Gweithgarwch Deintyddol fel rhan o'r Rhaglen Diwygio Gwasanaethau Deintyddol Cyffredinol sy'n ailddechrau ar 1 Ebrill 2022. Trafodwch y mater gyda'ch bwrdd iechyd, os oes angen.

12. Mae'n debyg bod Atal a Gwella Ansawdd yn eithaf pwysig wrth ddarparu gwasanaethau deintyddol. A oes unrhyw hyfforddiant ar gael?

Oes, mae cyrsiau hyfforddi am ddim (Gwneud i waith ataliol weithio'n ymarferol, Cynllun Gwên yn y ddeintyddfa a chysiau DPP perthnasol eraill) ar gael gan AaGIC. Gallwch hefyd gysylltu â'ch Addysgwr Deintyddol Gwella Ansawdd i gael cymorth ar unrhyw brosiectau neu fentrau gwella ansawdd yn HEIW.DentalQI@Wales.nhs.uk.